

Apelacioni sud Brčko distrikta Bosne i Hercegovine u vijeću sastavljenom od sudija Damjana Kaurinović, kao predsjednika vijeća i Srđana Nedić, Josipe Lucić, Maide Kovačević i Dragane Tešić, kao članova vijeća, u postupku ocjene usklađenosti pravnih akata Brčko distrikta Bosne i Hercegovine, postupajući po inicijativi ... I.K. i P.V., na osnovu člana 27. tačka e. Zakona o postupku ocjene usklađenosti pravnih akata Brčko distrikta Bosne i Hercegovine („Službeni glasnik Brčko distrikta BiH“, broj 20/10), na sjednici vijeća održanoj dana 22.01.2016. godine, d o n i o j e

R J E Š E N J E

NE PRIHVATA SE inicijativa za ocjenu usklađenosti Zaključka Skupštine Brčko distrikta BiH broj: 01-02-551/15 od 05.11.2015. godine donesen na prvom nastavku 16. vanredne sjednice Skupštine, održane dana 05.11.2015. godine, sa odredbama člana 33a stav 3 Statuta Brčko distrikta BiH („Službeni glasnik Brčko distrikta BiH“, broj 2/10).

Obrazloženje

Dana 23.11.2015. godine ... I.K. i P.V. podnijeli su inicijativu za ocjenu usklađenosti Zaključka Skupštine Brčko distrikta BiH broj: 01-02-551/15 od 05.11.2015. godine koga je donijela Skupština Brčko distrikta BiH na prvom nastavku 16. vanredne sjednice Skupštine, održane dana 05.11.2015. godine, sa odredbama člana 33a stav 3 Statuta Brčko distrikta BiH („Službeni glasnik Brčko distrikta BiH“, broj 2/10).

Podnosioci inicijative navode da je Skupština usvajanjem predmetnog Zaključka suspendovala odredbe člana 33a stav 3 Statuta Brčko distrikta BiH i Poslovnika o radu Skupštine kojima je pitanje opravdanosti izostanaka jasno regulisano.

U inicijativi se dalje navodi da su podnosioci inicijative poslanici Skupštine Brčko distrikta BiH iz reda hrvatskog naroda, poštujući odredbe Poslovnika o radu Skupštine, blagovremeno dostavili obavještenja o privremenoj spriječenosti za rad, pa iz opravdanih razloga nisu prisustvovali prvom nastavku 16. vanredne sjednice, kojoj su prisustvovala samo dva poslanika od ukupno četiri iz reda jednog konstitutivnog naroda.

Inicijativa ukazuje da je s obzirom na činjenicu da je na dnevnom redu bila Odluka o usvajanju budžeta Brčko distrikta BiH za fiskalnu 2015. godinu, odnosno Odluka koja je bila predmet afirmativnog glasanja u skladu sa članom 53 stav 2 Statuta, potpredsjednik Skupštine bio u obavezi da razmatranje i glasanje o

navedenim Odlukama odloži dok najmanje tri poslanika iz reda svakog konstitutivnog naroda ne budu prisutna sjednici Skupštine.

Podnosioci inicijative navode da je i pored dostavljenih opravdanja o njihovom odsustvu Skupština predmetnim Zaključkom nezakonito proglasila da su neopravdano odsutni, te se na osnovu tog Zaključka pristupilo usvajanju Odluke o budžetu Brčko distrikta BiH za 2015. godinu.

U skladu sa odredbom člana 15 Zakona o postupku ocjene usklađenosti pravnih akata Brčko distrikta BiH i rješavanja sukoba nadležnosti i člana 8. Poslovnika o radu Apelacionog suda Brčko distrikta Bosne i Hercegovine u postupcima ocjene usklađenosti pravnih akata Brčko distrikta Bosne i Hercegovine i rješavanju sukoba nadležnosti, sud je dopisom broj 97 o U 001665 15 Ous od 27.11.2015. godine zatražio mišljenje donosioca osporavanog akta o podnesenoj inicijativi.

Dopisom broj predmeta 01.1-02-1066/15 od 15.12.2015. godine, Potpredsjednik Skupštine Brčko distrikta BiH, kao donosilac osporavanog akta, dao je mišljenje o inicijativi. U mišljenju je navedeno da se iz odredbi člana 12 i 77 Poslovnika o radu Skupštine dâ zaključiti da je zakonodavac imao u vidu regulisanje izostanka jednog ili više poslanika sa sjednice, a svakako ne izostajanje u kontinuitetu sa više sjednica uzastopno.

Dalje se navodi da je članom 25 Statuta Brčko distrikta BiH propisano da se poslanici u javnom životu moraju ponašati na primjeren, prikladan i etičan način, te obavljati svoje dužnosti savjesno i isključivo za dobrobit Brčko distrikta BiH, dok Poslovnik o radu Skupštine u članu 10 propisuje da poslanici imaju pravo i obavezu prisustvovati sjednicama i učestvovati u radu Skupštine, a da je jedna od primarnih obaveza Skupštine svakako usvajanje budžeta.

Donosilac predmetnog Zaključka ističe da su podnosioci inicijative izostajali sa sjednica Skupštine u dužem kontinuitetu, te da su izjavili na jednom od pripremnh sastanaka da neće prisustvovati sjednicama kada je na dnevnom redu usvajanje budžeta, pa smatrajući da je time došlo do zloupotrebe odredbi članova 12 i 77 Poslovnika o radu Skupštine i onemogućeno ispunjavanje obaveze usvajanja budžeta, Skupština je morala pristupiti donošenju predmetnog Zaključka.

Relevantni propisi:

Statut Brčko distrikta Bosne i Hercegovine
(„Službeni glasnik Brčko distrikta BiH“, broj 2/10).

Član 33a Sprečavanje preglasavanja

- (1) Pored potrebne većine propisane ovim statutom, potrebni su afirmativni glasovi najmanje jedne trećine poslanika svakog od konstitutivnih naroda koji su prisutni i glasaju za odluke Skupštine koje se odnose na:
 - (a) usvajanje i izmjene ovog statuta;

- (b) usvajanje i izmjene Poslovnika o radu Skupštine;
 - (c) usvajanje i izmjene zakona ili odluka koje su predložili poslanici u vezi s pitanjima koja bi inače bila predmet afirmativnog glasanja u Vladi u skladu s članom 53(2) ovog statuta;
 - (d) usvajanje amandmana koje su predložili poslanici između dva čitanja zakona ili odluka koje su bile predmet afirmativnog glasanja u Vladi u skladu s članom 53(2) ovog statuta;
 - (e) usvajanje i izmjene zakona Distrikta kojima se uređuje rad Vlade Distrikta u dijelu kojim se reguliše pitanje afirmativnih glasova članova Vlade Distrikta shodno članu 53(2) ovog statuta;
 - (f) odluke donesene shodno članu 33(1) (d), (e), (f) i (g);
 - (g) odluke donesene shodno članu 33(2) (a) i (b);
 - (h) nacionalne praznike i spomenike;
 - (i) sporazume shodno članu 9 ovog statuta.
- (2) Minimum od jedne trećine afirmativnih glasova koji je potreban u skladu sa stavom 1 ovog člana neće ni u kom slučaju iznositi više od tri (3) glasa.
- (3) U slučaju da, iz opravdanih razloga, na sjednici Skupštine nema više od dva (2) poslanika iz jednog konstitutivnog naroda u trenutku kada se odlučuje o pitanjima iz stava 1 ovog člana, razmatranje i glasanje o predmetnim odlukama se odlaže dok najmanje tri (3) poslanika iz reda tog konstitutivnog naroda ne budu prisutni na sjednici Skupštine. U takvim situacijama detaljan postupak propisuje se u Poslovniku o radu Skupštine.
- (4) U slučaju da sjednici Skupštine prisustvuje tri (3) do pet (5) poslanika iz jednog konstitutivnog naroda, jedan afirmativni glas smatra se kao jedna trećina afirmativnih glasova potrebnih u skladu sa stavom 1 ovog člana.
- (5) U slučaju da sjednici Skupštine prisustvuje šest (6) do (8) poslanika iz jednog konstitutivnog naroda, dva afirmativna glasa smatraju se kao jedna trećina afirmativnih glasova potrebnih u skladu sa stavom 1 ovog člana.
- (6) Uzdržani glasovi uzimaju se u obzir pri utvrđivanju kvoruma ali se ne uzimaju u obzir pri utvrđivanju većine niti se ubrajaju u ukupan broj glasova za usvajanje odluka Skupštine u skladu sa stavom 1 ovog člana.

Zaključak Skupštine Brčko distrikta BiH
broj 01-02-551/15 od 05.11.2015. godine

Na osnovu člana 22 Statuta Brčko distrikta BiH – prečišćeni tekst („Službeni glasnik Brčko distrikta BiH“ broj 2/10) i člana 32 i 64 stava 7 Poslovnika o radu Skupštine Brčko distrikta BiH („Službeni glasnik Brčko distrikta BiH“, brojevi 17/08, 20/10, 4/13 i 31/13), razmatrajući Informaciju o blokadi usvajanju budžeta Brčko distrikta BiH za 2015. godinu nakon presude Apelacionog suda od 06. oktobra 2015. godine, Skupština Brčko distrikta BiH, na I nastavku 16. vanredne sjednice održanom 5. novembra 2015, donosi

ZAKLJUČAK

1. Imajući u vidu činjenicu da budžet Brčko distrikta BiH nije usvojen a bliži se kraj fiskalne godine, Skupština Brčko distrikta BiH izražava zabrinutost zbog neusvajanja budžeta Brčko distrikta BiH za 2015. godinu, nakon objavljivanja presude Apelacionog suda Brčko distrikta BiH. Takođe, Skupština Brčko distrikta BiH izražava zabrinutost da će zbog kontinuiranog neprisustva sjednici poslanika iz reda Hrvatske seljačke stranke kojim se onemogućava usvajanje budžeta za 2015. godinu biti dovedene u pitanje funkcije Brčko distrikta BiH i izvršavanje statutarne i zakonskih obaveza koje se moraju realizovati iz budžeta.
2. Takođe, izjava predstavnika Hrvatske seljačke stranke izrečena na pripremnom sastanku za 63. redovnu sjednicu Skupštine Brčko distrikta BiH da neće prisustvovati sjednicama Skupštine kada je na dnevnom redu isti budžet Brčko distrikta BiH a zbog stava organa njihove stranke o kontinuiranom neprisustvovanju sjednicama Skupštine Brčko distrikta BiH, izražava se zabrinutost da ovakav vid političke borbe može nanijeti nesagledivu i nepopravljivu štetu u funkcionisanju institucija Brčko distrikta BiH i svih građana Brčko distrikta BiH i da se ovakvim stavovima i ponašanjem zloupotrebljavaju nejasnoće i manjkavosti članova 12 i 77 Poslovnika o radu Skupštine Brčko distrikta BiH kojim se reguliše odsustvovanje poslanika sa sjednica Skupštine Brčko distrikta BiH a imajući u vidu član 10 Poslovnika o radu Skupštine Brčko distrikta BiH kojim je propisano da „poslanici imaju pravo i obavezu da prisustvuju sjednicama i da učestvuju u radu Skupštine i skupštinskih komisija čiji su članovi“.
3. Imajući u vidu sve gore navedeno, Skupština Brčko distrikta BiH konstatuje da se mora pristupiti usvajanju budžeta Brčko distrikta BiH i izvršavanju statutarne obaveza Skupštine Brčko distrikta BiH kako se ne bi ugrozilo funkcionisanje Brčko distrikta BiH, bez obzira na neprisustvovanje sjednicama Skupštine Brčko distrikta BiH predstavnika Hrvatske seljačke stranke u Skupštini Brčko distrikta BiH, te shodno članu 64 stavu 7 Poslovnika o radu Skupštine Brčko distrikta BiH, Skupština donosi zaključak da pisano obavještenje poslanika o njihovoj odsutnosti smatra neopravdanim odsustvom iz razloga što se isto kontinuirano ponavlja i predstavlja očiglednu zloupotrebu nejasnoća i manjkavosti članova 12 i 77 Poslovnika, odnosno instituta opravdanog odsustva.
4. Ovaj zaključak stupa na snagu danom donošenja i biće objavljen u Službenom glasniku Brčko distrikta BiH.

Broj: 01-02-551/15

Brčko, 5. novembra 2015. godine

POTPREDsjedNIK
SKUPŠTINE BRČKO DISTRIKTA BIH
Adem Ribić, s.r.

Poslovnik o radu Skupštine Brčko distrikta BiH

Član 9

(Ponašanje poslanika u javnom životu)

- (1) Poslanici se u javnom životu moraju ponašati na primjieran, prikladan i etičan način, te obavljati svoje dužnosti savjesno i isključivo za dobrobit Distrikta i Bosne i Hercegovine.
- (2) Poslanici u svom radu primjenjuju i poštuju Kodeks ponašanja poslanika Skupštine Brčko distrikta Bosne i Hercegovine (u daljnjem tekstu: Kodeks).

Član 10

(Prava i dužnosti poslanika)

- (1) Poslanici stiču prava i dužnosti u Skupštini od dana polaganja zakletve ili davanja svečane izjave, u skladu s članom 25 ovog poslovnika.
- (2) Poslanici imaju pravo i obavezu da prisustvuju sjednicama i da učestvuju u radu Skupštine i skupštinskih komisija čiji su članovi.
- (3) Poslanici imaju obavezu da ispunjavaju zadatke koje im dodijeli Skupština ili njene komisije.

Član 12

(Odsustvo sa sjednice Skupštine)

- (1) Poslanici koji su spriječeni da prisustvuju sjednici Skupštine ili komisije, ili iz određenih razloga treba da u toku rada napuste sjednicu, moraju o tome blagovremeno obavijestiti predsjednika Skupštine ili predsjednika komisije i opravdati razlog svog odsustva.
- (2) Stručna služba Skupštine (u daljnjem tekstu: Stručna služba) vodi posebnu evidenciju o slučajevima iz stava 1 ovog člana.

Član 64

(Vrste opštih akata Skupštine)

- (1) Skupština na osnovu prava i ovlašćenja utvrđenih Statutom Distrikta i ovim poslovníkom usvaja Statut i izmjene Statuta Distrikta, Poslovnínik, zakone Distrikta, budžet Distrikta, odluke, deklaracije, rezolucije, preporuke i zaključke o svim pitanjima u nadležnosti Skupštine, te daje autentična tumačenja zakona i drugih opštih akata Skupštine.
- (2) Odluka se donosi kao akt kojim Skupština izražava svoju volju i odlučuje o pitanjima iz svoje nadležnosti u skladu s članom 22 Statuta Distrikta, zakonima i drugim opštim aktima.
- (3) Deklaracijom se izražava opšti stav Skupštine o pitanjima vezanim za ostvarivanje opšte politike Distrikta, te o drugim pitanjima bitnim za Distrikt.
- (4) Rezolucijom Skupština ukazuje na stanje i probleme u određenom području društvenog života, te ukazuje na mjere koje bi trebalo sprovesti u tom području.
- (5) Preporukom se ukazuje na predstavke, pritužbe ili podneske koji ukazuju na nepravilnosti u radu tijela ili institucija koje imaju javna ovlašćenja, te daje prijedloge za njihovo razrješenje.

- (6) Zaključcima Skupština utvrđuje mišljenje o određenim pojavama, zauzima stav, ili utvrđuje obaveze gradonačelnika, pojedinih odjeljenja Vlade ili drugih institucija Distrikta kada je to u nadležnosti Skupštine.
- (7) Zaključkom se mogu rješavati i određena procesna ili pitanja o načinu rada Skupštine u slučaju da takva pitanja nisu utvrđena odredbama ovog poslovnika.
- (8) Autentičnim tumačenjem se pojašnjavaju nejasnoće u pojedinim zakonima ili drugim propisima koje donosi Skupština.

Član 77

(Otvaranje sjednice i utvrđivanje kvoruma)

- (1) Predsjednik otvara sjednicu Skupštine nakon što utvrdi prisustvo više od polovine ukupnog broja izabranih poslanika.
- (2) Kvorum se utvrđuje prebrojavanjem prisutnog broja poslanika.
- (3) Kada se kvorum utvrdi, sjednica se može otvoriti bez obzira što predloženi dnevni red sadrži prijedloge za čije usvajanje je potrebna natpolovična većina glasova poslanika ili neka druga većina glasova poslanika.
- (4) Predsjednik obavještava Skupštinu koji poslanici su poslali pisano obavještenje o njihovoj spriječenosti da prisustvuju sjednici.
- (5) Poslanici koji prije početka sjednice nisu poslali pisano obavještenje predsjedniku Skupštine o razlozima svoje spriječenosti da prisustvuju sjednici Skupštine, smatraju se neopravdano odsutnim.

Član 99

(Postupak odlučivanja u slučaju odsutnosti poslanika iz jednog od konstitutivnih naroda)

- (1) Za donošenje odluka iz člana 33a stava 1 Statuta Distrikta, potrebno je da na sjednici Skupštine prisustvuju najmanje tri (3) poslanika iz svakog konstitutivnog naroda.
- (2) Kada iz opravdanih razloga, na sjednici Skupštine ne prisustvuje više od dva (2) poslanika iz jednog od konstitutivnih naroda u vrijeme donošenja odluke iz člana 33a stava 1 Statuta Distrikta, diskusija i glasanje o toj odluci odlažu se dok se ne obezbijedi prisustvo najmanje tri (3) poslanika iz tog konstitutivnog naroda.
- (3) Pod opravdanim razlozima u smislu stava 2 ovog člana podrazumijeva se odsustvo poslanika koji je svoju spriječenost da prisustvuje sjednici opravdao pod uslovima iz člana 12 i člana 77 stavova 4 i 5 ovog poslovnika.
- (4) Diskusija i glasanje o odluci iz stava 2 ovog člana mogu se odložiti promjenom redoslijeda tačaka dnevnog reda tekuće sjednice ili uvrštavanjem te tačke u dnevni red prve naredne sjednice u zavisnosti od toga kada se može obezbijediti prisustvo najmanje tri (3) poslanika iz reda konstitutivnog naroda koji je u pitanju.
- (5) U slučaju da odsutni poslanici ne opravdaju svoje odsustvo u smislu člana 12 i člana 77 stavova 4 i 5 ovog poslovnika, za donošenje odluke iz stava 2 ovog člana ne zahtijeva se minimum od jedne trećine potvrdnih glasova poslanika iz reda

konstitutivnog naroda čiji su poslanici neopravdano odsutni, tako da se odluka može donijeti i bez potvrdnih glasova preostalih prisutnih poslanika iz tog konstitutivnog naroda.

Kodeks ponašanja poslanika Skupštine Brčko distrikta BiH

III. Opšta pravila ponašanja

2. Poslanici se u javnosti moraju ponašati primjereno, prikladno i etično i istovremeno obavljati dužnosti po svojoj savjesti i isključivo za dobrobit Brčko distrikta BiH, njegovih građana i Bosne i Hercegovine.
3. U vršenju svog mandata poslanici ne smiju stavljati vlastite interese ispred opštih interesa.
5. Poslanici će uvijek služiti opštem interesu i suzdržavaće se od svakog ponašanja kojim mogu ugroziti svoj i kredibilitet Skupštine. Poslanik je dužan da se ponaša na način kojim će očuvati i pojačati povjerenje građana u integritet i efikasnost Skupštine.
7. Poslanici će demonstrirati djelotvoran pristup u rješavanju problema. Poslanici će imati na umu da predstavljaju primjer stanovnicima, poslovnim ljudima i ostalim biračima koji učestvuju u javnim raspravama. Svojim primjerom moraju pokazati kako osobe različitih stavova mogu naći zajednički jezik i potražiti kompromis koji je od koristi građanima Brčko distrikta BiH u cjelini.

IV. Posebna pravila ponašanja

6. Poslanici će omogućiti neometan tok zasjedanja i sastanaka -

Polazeći od navoda inicijative i mišljenja donosioca osporavanog akta, tumačeći jezički i logički smisao odredbi osporavanog Zaključka u kontekstu odredbi člana 33a stav 3 Statuta Brčko distrikta BiH ne može se naći da postoji neusklađenost istih.

Ocjenjujući osporavani Zaključak sud je utvrdio da takvim stavom i ocjenom Skupštine nisu narušene statutarne odredbe iz člana 33a stav 3 Statuta Brčko distrikta BiH, na koje ukazuju podnosioci inicijative. Naime, statutarni princip sprečavanja preglasavanja ne znači da se svako odsustvo poslanika može smatrati a priori apsolutno opravdanim. Skupština, kao u predmetnom slučaju, cijeni da li je odsustvo poslanika opravdano ili neopravdano. To nesumnjivo potvrđuju odredbe člana 12 stav 1 Poslovnika o radu Skupštine Brčko distrikta BiH, jer je obaveza poslanika kumulativna: prvo moraju da blagovremeno obavijeste predsjednika Skupštine, a potom i opravdaju razlog svog odsustva.

U suprotnom, prema shvatanju podnosioca inicijative, svaki izostanak pravdan pismenim obavještenjem o spriječenosti prisustva zakazanoj sjednici Skupštine smatrao bi se opravdanim. Međutim, navedeno shvatanje, po ocjeni suda, predstavlja ekstezivno tumačenje svih relevantnih propisa što je neprihvatljivo, jer bi iniciralo moguće zloupotrebe prava poslanika i onemogućilo

redovan rad Skupštine. Intencija donosioca Statuta svakako je jasna i nedvosmisleno upućuje na restriktivnu primjenu odredaba člana 33a stav 3 Statuta.

U konkretnom slučaju ocjena izostanka podnosioca inicijative pravilno je cijenjena u kontekstu potrebe za usvajanjem budžeta što predstavlja opšti interes. U tom smislu, uzeta je u obzir i činjenica da su podnosioci inicijative i ranije izostajali sa skupštinskih zasjedanja što je po ocjeni Skupštine preraslo u kontinuirano ponašanje štetno za njen rad. Budžet je akt kojim se utvrđuje plan finansijskih aktivnosti budžetskih korisnika, koji obuhvata projekciju iznosa prihoda i primanja i utvrđenog iznosa rashoda i izdataka Distrikta za period od jedne fiskalne godine, kao i gornja granica ukupnog duga Distrikta, uključujući postojeći dug i projekciju novog duga za datu fiskalnu godinu. Dakle, predmet raspravljanja je bio najvažniji instrument finansijske i ekonomske politike Brčko distrikta BiH, kao i sve druge njegove komponente kao npr. razvojna, zdravstvena, obrazovna, socijalna i dr..

Sem toga, razlog konkretnog izostanka je bio nastavak uobičajene sjednice Predsjedništva Hrvatske seljačke stranke Republike Hrvatske u Zagrebu. Ne zanemarujući činjenicu da podnosioci inicijative imaju obaveze prema svojoj političkoj stranci, događaj koji je bio razlog njihovog odsustva nije te važnosti i značaja da bi se u smislu člana 12 Poslovnika o radu Skupštine Brčko distrikta BiH mogao smatrati opravdanim razlogom izostanka, ako se ima u vidu da je u navedeno vrijeme održano zasjedanje Skupštine Brčko Distrikta na kojem se razmatralo pitanje budžeta. Imajući u vidu konkretnu situaciju očigledno je da je odsustvo samo jednog poslanika moglo istovremeno zadovoljiti poslaničke obaveze i interese Brčko Distrikta, ali na drugoj strani i interese stranke čiji su inicijatori članovi.

Na kraju, obaveze podnosioca inicijative kao poslanika jasno su određene i članom 25 Statuta Brčko distrikta BiH kojim je propisano da su poslanici dužni savjesno i odgovorno obavljati svoje dužnosti isključivo za dobrobit Brčko distrikta BiH. Uostalom, inicijatori su kao poslanici položili zakletvu u smislu člana 25 stav 2 Poslovnika o radu Skupštine Brčko distrikta BiH i obavezali se da će štititi interese Brčko distrikta BiH.

Skupština Brčko distrikta je donošenjem predmetnog Zaključka na osnovu člana 64 stav 7 Poslovnika o radu Skupštine Brčko distrikta BiH tumačila nedostatke odredbi članova 12 i 77 Poslovnika i pravilno zaključila da se pisano obavještenje poslanika o njihovoj odsutnosti u konkretnoj situaciji smatra neopravdanim odsustvom.

S obzirom na sve prethodno navedeno, analizirajući pravni smisao osporavanog Zaključka u odnosu na statutarne garancije iz člana 33a stav 3 Statuta ovaj Sud je utvrdio da nije došlo do povrede principa sprečavanja preglasavanja, na koje podnosioci inicijative neosnovano ukazuju.

Cijeneći da je u toku prethodnog postupka pravno stanje potpuno utvrđeno i da prikupljeni podaci pružaju pouzdan osnov za odlučivanje, Sud je odlučio bez donošenja rješenja o pokretanju postupka, na osnovu člana 33 stav 2 Zakona o postupku ocjene usklađenosti pravnih akata Brčko distrikta BiH.

Imajući u vidu izneseno, shodno članu 27 tačka e Zakona o postupku ocjene usklađenosti pravnih akata Brčko distrikta Bosne i Hercegovine i rješavanja sukoba nadležnosti, odlučeno je kao u dispozitivu rješenja.

BOSNA I HERCEGOVINA
APELACIONI SUD BRČKO DISTRIKTA
BOSNE I HERCEGOVINE
Broj: 97 o U 001665 15 Ous
Brčko, 22.01.2016. godine

PREDSJEDNIK VIJEĆA

Damjan Kaurinović

Da je ovaj otpравak rješenja
saglasan sa izvornikom
tvrdi i ovjerava pisarnica Suda